

'S e flùr geal le gasan agus duilleagan tiugh a bhitheas a' fàs air creagan mara a th' ann am maraiche. Anns na seann làithean, mus robh fridsichean no biadh chanastairean ann cha robh mòran vitamins ann am biadh nan seòladairean. Bha iad a' gabhail tinneas air an robh an tachas-tioram, agus bha seo ag adhbhrachadh, cuide ri rudan eile, gun robh na fiacalan aca a' tuiteam àsda. Fhuair iad a-mach nan itheadh iad an lus seo, anns a bheil tòrr Vitamin C, nuair nach robh measan no glasraich aca gun toireadh e leigheis dhaibh.



buthaidean

Tha an ruideag a' dèanamh nead de fheamainn is poll agus tha seo a' dol cruaidh mar choncrete. Mar sin tha iad a' cleachdadh na leacan as lugha air creagan cas. Tha am fulmair a' neadachadh air leacan nas motha nas fhaide shuas a' chreag agus tha faoileagan a' neadachadh air an talamh as rèidh aig a' mhullach.

Tha buthaidean a' dèanamh tuill fon talamh no bithidh iad a' dol sìos tuill coineanaich. 'S fheàrr leotha eileanan no stacan far nach cuir daoine dragh orra.

gearra-breac



'S e fìor àiteachan neadachaidh a th' ann an creagan mara. Tha na h-eòin sàbhailte bho nàimhdean an-sin. Ged a dh'fhaodadh mòran eòin eadar-dhealaichte a bhith a' neadachadh air creag, tha am feumalachdan fhèin aig gach seòrsa.

Tha gearraidhean breaca a' neadachadh ann an tuill no ann an sgoran faisg air bonn na creige. Tha falcaichean a' neadachadh ann an sgoran nas fhaide shuas agus tha eòin an sgadain còmhla air leacan. Chan eil na h-eòin sin a' dèanamh neadan agus tha iad a' breith aon ugh air a' chreag lom.